

惜抱軒集

惜抱軒文集九

策問

乾隆戊子科山東鄉試策問五首

問古者立學釋菜祀其國賢者為先師示學者取法前哲從地近者始也矧東士為聖人父母之邦名儒繼踵多士仰慕師法尤易興起者乎春秋時若柳下惠李文子孟獻子之流嘉言懿行於傳述焉多士宜誦習而考其純駁矣及孔子同時所交遊者大抵齊魯賢士太史公既稱孔子嚴事晏平仲矣而又載晏子嘗沮尼谿之封夫晏子賢者而其言何謬乎抑史所載有未信乎劉向錄晏子於儒家而柳宗元謂其書出於墨子之徒又何說也孔子之後齊魯儒者各有著書惜哉今不盡傳其篇目存亡可攷者凡幾曾子之書見存於大戴禮記者十篇與論語中曾子之語精粗奚若孟子十一篇今存者七篇其餘軼說尚可聞乎荀子嘗為齊稷下祭酒矣古以孟荀同稱然荀子乃詆子思孟子之說為非是夫何悖哉抑其言今多載於禮記諸生能別出之而論其當否歟漢初若魯申培穆生白生齊轅固濟南伏生之屬誠多賢者其後若公孫宏兒寬韋賢父子蕭望之匡衡孔光皆齊魯之儒皆致位公

相矣乃其人邪正優劣則何如也鄭康成於東漢之末興於高密為海內鉅儒夫世言理學者宗閩洛而考證經義詳博者推漢儒雖然漢儒行事具在將謂其第能博聞稽古為有功於經乎抑有躬修實踐誠無媿於儒者也宋儒孫明復石守道最有重名其人亦可與閩洛諸儒竝論之否方今

皇上聖學日躋繼古道統崇經術獎德行所以興起教化勸示儒林者至矣諸生承

聖朝之澤而追鄉里之賢尚友千古考論辨說所慨慕企仰者何如哉願聞之以
胡志趣焉

問儒者之學非一端而欲觀古人之迹辨得失之林必求諸史為史之家有數體而欲統貫終始言簡事該其法必取諸編年昔者孔子作春秋為編年家之所祖筆削褒貶學者述焉然孟子曰其文則史左傳亦間稱其體為禮經之舊然則聖人所筆削者殆無多歟自是之後為編年之史者有荀悅漢紀張璠袁宏後漢紀習鑿齒漢晉春秋干寶晉紀孫盛晉陽秋裴子野宋畧之類其書或傳或不傳然昔人固有評之者其槩可略聞歟宋司馬文正公以遷固以來文字繁多刪削冗長舉其大要作資治通鑑觀其進書表自謂

搜摘幽隱計較毫釐則可謂盡善矣乃若漢留侯之致四皓唐莊宗之負囊矢豔稱今古而何以不載而雜家小說若西京雜記平剡錄之類轉有採者何哉其後朱子因之作綱目其法益備而義益精第以門人編錄或不免脫漏漏舛誤諸生嘗盡讀而考論之乎夫孔子序尚書始於堯太史公亦止紀五帝溫公通鑑註始於三晉而劉恕外紀獨上追盤古夫恕固與溫公同修書者而茲何其異也其餘前編續編續綱目等書孰為優劣王應麟胡三省為通通鑑注尹起莘劉友益為綱目發明書法其得失何如楊子雲曰子長多愛愛奇愛奇史氏通病豈獨子長哉故審理論世覈實去偽而不為古人所愚善讀史者也我

皇上聖學淵深睿知首出故

御定通鑑綱目三編及近奉

御批通鑑輯覽所取予進退莫不歸於至當譬之日月至明幽隱必照千載之遠不能欺也多士承

聖訓而仰文明於史氏之學必有能稱量是非自據所見者盡詳著於篇

問夏書紀九州而各載其貢道蓋以急惟正之供謀轉輸之便聖人所以安

國而利民也禹時九州之中四州貢道皆在今山東之境或由濟漯或由汶泗皆達河以至帝畿或謂徐州浮於淮泗達於河河乃荷字之誤是何謂耶自水道屢變大河改流而南而

國家建都燕京則天下糧運皆由會通河以至太倉而山東為咽喉扼要之地是其勢較古時為尤重夫運河北所行者漳水也南所行者泃承沂泗也臨清以南濟甯以北則上下皆賴於汶水昔人言汶水有五源別而流同其詳可得聞歟明永樂中尚書宋禮用白英策築濬東平之戴邨遏汶盡出南旺分流南北可謂巧於濟運矣然南旺地勢特高故昔人謂去閘則南北分瀉一空況天時不齊或有旱竭固其理也然則豫備之使無患運道者宜以何術周禮稻人以瀦蓄水以防止水考工記曰善防者水淫之初宋禮於汶上東平濟甯沛縣並湖地設水櫃斗門櫃以蓄泉門以洩漲然水櫃在明時已苦易淤今固不免填塞矣夫豈乏善防之術如周禮所云逆地防不理孫者乎抑湖濱之民或有侵占失其舊而吏不之省乎且唐時承縣有十三陂以為沃壤澤縣其故界也今將舉湖陂之利盡修復之內美田疇外資舟相其道何道何以籌之至於濬淺置閘之策前人謀之詳矣其在今日尚有可議

者歟夫通古今之謂儒漕運經國之重務也是以

皇上既嘗親蒞河隄指示方畧至兩澤小有不時必上軫

宸慮咨命河臣毋敢怠忽意至切矣然則考稽川瀆講求利病幾一得以佐當世之用亦儒者事也其各陳所見以為

當寧獻

問國家設官分職各有典司而惟守令最為親民之吏使親民之吏舉得其人則天下何患不治使親民之吏一方失其人則一方受其病朝廷雖有良法善政皆為虛文而已恭惟我

皇上愛養黎庶軫念如傷重司牧之官慎察吏之政是以網維建立於上羣生禔福於下治化之澤行而貪暴之風寡矣雖然海內至大人情萬殊賢者固各舉其職而間有不肖或亦偷容其間今將使郡縣之吏盡稱其職其道以何者為要夫人難求備德性多偏吏之嚴明者或鮮慈惠仁愛者或過於寬柔所謂嚴而不殘愛民如子見惡如農夫之去艸者甚難其人今將聽長民者意之所自趨乎抑國家法令有可以持其偏而扶其弊者歟至其甚者則又或放縱無忌黷冒侵恠是以今者稽察之令責成上官而執法除邪明示懲

創筭猶恐上官以姑息而吏巧於避法何以禁之且國風羔羊之詩美節儉正直之德夫節儉則無侈費正直則無營求無侈費無營求則取用於庠俸寬然有餘資矣而曷至甘為墨吏哉然則奢蕩營謀者吏治之所由敗也今欲羔羊之美徧于郡邑而無簠簋不飭之譏將焉所立法而後可昔者司馬子長始傳循吏而所載公儀子固晉人也諸生亦嘗讀史而慕其風歟漢書循吏六人後漢書循吏十二人其所為之迹有於今可做而用之者亦有不

可施於今者尚分別論之至其餘如趙張三王之流雖不入於循吏之傳然其治道實有足為史法者採其長而施之於今奚不可也諸生其援古以合諸當世之要書所謂學古入官者蓋將有取於此

問民俗美惡因上治化王者在上道德一而風俗同言治化無弗徧也雖然當周盛時分封魯衛及晉已有用夏政商政周索戎索之異然則所云風俗同者舉其槩而已其水土風氣性情習尚之偏聖人不能強使合也故曰修其教不異其俗齊其政不易其宜昔者周公尊尊而親親太公舉賢而上功二者殊而齊魯皆治及其衰則洙泗之間斷斷如也而臨淄至以多劫人為大國之風於是乎曹參以勿擾獄市容姦為治矣若是者豈風俗一變不可

復反乎將其時上所以導之者失其理乎恭惟

國家平治百年百姓自厥祖父被

列聖教養之澤加以我

皇上建極錫福德溥而化光是以山東境內秀民則詩書絃誦愚民則重農桑務本業有淳古之風豈非以其質性敦樸處地近而感化尤速乎雖然恬熙久而侈肆萌生齒繁而游惰起文學固可貴而恐其質行之衰織作冰紈冠帶衣履天下之舊不必復而恐其本富之不足欲防其弊厥道奚從且欲保風俗之美者莫要於去姦民昔管子治齊參其國而伍其鄙使罷士無伍罷女無家管仲雖非王道之器及其治國實與周禮比伍族閭閻相保相愛者同意諸生能舉其法之詳而識其要歟今山東東階巨海廣斥之野南岨蒙羽西連湖澤盜賊匪人或託迹焉夫列郡舉行保甲之法豈非周公管子之遺去姦宜得其要矣姦民猶有窟匿何耶將山澤曠遠有散處幽阻難以比次歟抑市廛雜運流冗來去無常難以踪跡歟不然則吏奉行者不盡實歟諸生生長其間見聞熟矣欲登進其風俗之美而彰善癉惡以敦治道諸生私所議論者謂何其悉論陳之

乾隆庚寅科湖南鄉試策問五首

問古者立教多以文章禮樂為則未嘗輕言性命而性命之理實無不明其後學者岐分異說競起於是言性理者紛紛焉蓋孔子之傳惟孟子得其宗至若莊周荀卿之屬推其原未嘗不出於孔氏之徒而卒不勝其刺謬者何也夫言性惡者其恃不待論矣董仲舒對策陳性命之情韓愈作原性李翱作復性書皆依於儒先之旨而時有純駁將何所去取歟昔箕子言五事周禮言六德孔子四教文行忠信而已孟子始言四端及宋周子又舉仁義中正夫道一而已聖賢所舉之目何其參差也將有同條共貫者存而不嫌於言之異乎自漢以來天下賢人君子不可勝數然言道學孟子之後遂紹以周張程朱其實何以定之且周子言無極太極頗近於太始無始主靜則近於寂滅之旨主一則近於常德不離之教正學異端懸於霄壤而判於微茫奚以析焉方今

聖天子在上至德至教究廣大而極精微接羲軒之統探孔顏之蘊垂則士林嚮風興起湖南為周子故鄉餘風未泯尤宜有推闡服習其微言者諸生其母謂誦習宋儒第為科舉之學也試悉據所自得焉

問史家之體多矣而紀傳之敘載為詳為紀傳者亦多矣而司馬遷班固為首故言史法者宗史漢而已夫史記之紀五帝三王援據尚書及帝繫篇不敢多人異說蓋其慎也然楊子雲猶云子長愛奇乃後人補述或反溢於子長之外何耶漢書本紀止於十二張衡謂宜增元后紀豈誠班氏之疏乎表所以般列事時使人易曉共和以前之年不可知也司馬遷表燕昭齊宣時事亦與孟子諸書不合者為何漢有功臣表與外成恩澤侯表景帝以後侯國以降將得者皆進於功臣丞相封侯雖以魏相丙吉之賢皆列於恩澤其升降義當然乎抑有所失耶後世之史多作兵志而史漢不著其目并分見於他篇其義安取孔子或謂不當入世家屈賈魯鄒或謂不當同傳進游俠退處士前人并以是議遷能斷其功過歟史記西域之事何以附於博望漢書宗廟之議何以附於韋賢又霍去病之於子孟賈生之於君房雖為一家而列傳釐分各以事彙當矣至劉向以附元王而不與蕭傳同傳張湯杜周不入酷吏其於本書體例能無參差乎恭惟

皇上萬幾之暇披閱前史弔千古之匿情剖儒生之疑說

特著論辨啟牖羣蒙士得奉折衷之論以盡探石室之藏將博學精思足備異日

珥筆之選者必有其人焉故詢史漢數端以覘其槩云

問管子曰有地牧民者務在四時守在倉廩賈生曰積貯者天下之大命古聖王之制九年耕必有三年之食以三十年之通雖有凶旱水溢民無菜色則積貯莫善於此其後李悝治魏視年豐殺以為糴出之節是雖富强之術其計畫亦足為王政資漢五鳳年間始設常平倉其法悝之遺法也然當時止用於邊郡一傳及元帝而罷之豈其道有不便於民乎抑吏為之不善也隋時有義倉之名宋儒定社倉之制言積貯者大抵因此三術其建置本末利害得失之相較可悉聞歟今州縣各設常平倉又令鄉邑自為社倉國家籌為民厚生者至矣湖南之地古所云火耕水耨民食魚稻齒齕始生而無積聚者然則議積貯於茲地尤其急也夫土壤卑溼官存倉穀久貯則有紅朽之虞歲糴則有強派抑買之弊是將何以杜之社倉積穀雖民所自為然將一聽於民而官不為之經理歟將使吏與於其間而毋乃又為閭里擾歟必使吏良而令行民賴其利將何術與夫審民生纖悉以達於謀國大體儒者有用之學也願聞陳義之詳密焉

問民有四而士其表率也士習既端則國多卿大夫之材而民安於從化古

之時鬼置之士皆可為干城父與父言慈子與子言孝一有罷士不得容於其間也周秦之交士習始漓而縱橫狙詐之說以起自漢以來士風又屢變矣方今多士涵濡於

列聖重熙累洽之餘又仰被

皇上聲律身度之教嚮仁慕義俊民聿興詩云藹藹王多吉士固茲時也若乃九州萬國地廣俗殊椎魯者無文華巧者失實南北異尚何以齊其短長又其間間有居庠序而侵吏事舍樸厚而樂輕俠有士之名而實為士之蠹地有師儒而未必盡從其教歲舉優劣而未必盡得其實將使化導得行而激勸各當其道曷由諸生夙誦洙泗閩洛之言所以自正其身者即

國家所以整齊天下之理也修己移風試為悉陳其要

問詩以言志虞廷設教蓋首用之唐時以律詩試士其後或沿或否

聖上以科舉表判之法文具無實乃

詔試士增用詩題所以觀學者性情才力畢陳而不可掩也今試以古今體制之殊俾諸生縱論之五言詩始于枚乘蘇李其後作者輩出魏晉而下太白譏其綺麗退之斥為蟬噪果無足取若是乎李杜詩之大家而朱子尤推子昂

感遇者則又何說七言歌行王子猷所告謝太傅者已盡其理能闡發其意與唐宋金元明諸家歌行一體派別尤多而各極其致其正變何以衡之自沈約始言聲病五言近體權輿於此唐初言律詩者推沈宋其後諸家少變其法中唐作者多以五律為長然以視開寶以前何如也元微之推杜子美為第一者其長律一體耳子美果以是獨絕而律詩必以是為正法乎七言律詩明人之論或主王維李頎或主杜子美而盡斥宋元諸作者意亦隘矣然蘇黃而下氣體實自殊別意有不襲唐人之貌而得其神理者存乎夫唐人之詩古今獨出或謂惟絕句一體最為得樂府之遺者是何謂也我

朝文治百有餘年風雅之林炳焉極盛

皇上睿藻昭回圓古今而羅萬象學者少窺萬一以翦衡千古詩人之作如登高臨谷如持鑑察形較如其易明也可以究舉而詳說矣

惜抱軒文集十

傳

朱竹君先生傳

朱竹君先生名筠大興人字美叔又字竹君與其弟石君珪少皆以能文有名先生中乾隆十九年進士授編修進至日講起居注官翰林院侍讀學士督安徽學政以過降級復為編修先生初為諸城劉文正公所知以為疏雋奇士及在安徽會

上下詔求遺書先生奏言翰林院貯有永樂大典內多有古書世未見者請開局使尋閱且言搜輯之道甚備時文正在軍機處顧不喜謂非政之要而徒為煩欲議寢之而金壇于文襄公獨善先生奏與文正固爭執卒用先生說上之四庫全書館自是啟矣先生入京師居館中纂修日下舊聞未幾文正卒文襄總裁館事尤重先生先生顧不造謁又時以持館中事與意迕文襄大憾一日見

上語及先生

上遽稱許朱筠學問文章殊過人文襄默不得發先生以是獲安其後督福建學政逾年

上使其弟珪代之歸數月遂卒先生為人內友於兄弟而外好交遊稱述人善惟恐不至即有過輒覆掩之後進之士多因以得名室中自晨至夕未嘗無客與客飲酒談笑窮日夜而博學彊識不衰時於其間屬文其文才氣奇縱於義理事

物情態無不備所欲言者無不盡尤喜小學為學政時遇諸生賢者與言論若同輩
勸人為學先識字語意諄勤去而人愛思之所欲著書皆未就有詩文集合若干卷
姚鼐曰余始識竹君先生因昌平陳伯思是時皆年二十餘相聚慷慨論事厚厲講
學其志誠偉矣豈第欲為文士已哉先生與伯思皆高才耽酒伯思中年致酒疾不
能極其才先生以文名海內豪逸過伯思而伯思持論稍中焉先生暮年賓客轉盛
入其門者皆與交密然亦勞矣余南歸數年聞伯思亦衰病而先生沒年才逾五十
惜哉當其使安徽福建每攜賓客飲酒賦詩遊山水幽險皆至余聞至山中厓谷輒
遇先生題名為想見之焉

張逸園家傳

張逸園君者諱若瀛字印沙曾祖兵部尚書諱秉貞祖諱茂稷考諱廷珪皆贈左都
御史廷珪三子長若桂仕至左都御史而君其季也都御史為人端凝樸慎而君慷
慨強果自其兄弟少時里人皆異之矣君始以諸生為書館膳錄敘勞授主簿借補
熱河巡檢熱河今為承德府君仕時未設府縣以巡檢統地逾百里歲為天子巡
駐之所四方民匪居其間君以嚴能治辦奸蠹屏除留守內監為僧者曰于文煥君
一日行道見其橫肆立呼至杖之於是熱河內府總管怒奏君擅杖近御直隸總督

亦劾君 上聞之顧喜君強毅不之罪而以劾君者為非其後為良鄉知縣順天府南路同知有旗民張達祖居首輔傳忠勇公門下始有地數百頃賣之民矣久而地值數倍達祖以故值取贖構訟經數官不敢為民直君至傳忠勇頗使人示意君也君告之以義必不可卒以田歸民畿南多回民久聚為竊盜不可勝詰君多布耳目得其巨魁或親捕之凡半年獲盜百餘盜畏之甚乃使一回民偽來首云有某人至其家巨盜也及捕之至即自首某案已所為盜有贓在京師禮拜寺君使兵役偕之至禮拜寺則反與閹鬪至刑部訊以某案事與此人無與以君為誣良議當革職既而 上見君名疑部議不當召君令軍機處覆問減君罪發甘肅以知縣用是時

上意頗嚮君然卒降黜者大臣固不助君也在甘肅二年嘗為張掖復營兵所奪民渠水利又以張掖黑河道屢遷所過之田為沙磧數百頃而歲輸糧草未除力請於總督奏除之時甘肅官相習偽為災荒請賑而實侵入其財自上吏皆以為當然君獨不肯為其後為者皆敗於是世益推君君引疾去甘肅里居數年會兄都御史已進用 上數顧詢君狀君乃復出補直隸撫寧知縣其勤幹如昔然君年已六十餘矣以子鴻恩為兵部郎中受封朝議大夫例不為知縣遂去歸里又數年卒君居里為園時遊之名之曰逸園言已不得盡力為國勞而苟逸也故人以逸園稱君

姚鼐曰余家與君世姻好君為丈人行所謂逸園者負城西山面郊余先世亦園址也君數飲余於是自述平生為吏事奮髭抵掌氣勃然誠充其志所就可量哉君在里建毓秀書院為族人設藝局以養貧者親姻昏喪急難每賴其施以濟君亡久矣人方思之不能忘也然余尤偉君杖內監僧及不為傳忠勇曲論民田事為有古人剛毅之風故為著傳君能著於世矣才節遇知天子而仕抑屈於縣令惜哉命為之耶抑古之道終不合於今乎君長子鴻肇為戶部員外郎先卒次鴻恩為福建延平府知府次鴻磐

方晞原傳

方根矩歛人晞原其字也為歛諸生工為文其文用意高遠非今世之所謂時文者也而昔人所以取四子書為義之初旨則晞原得之為深其學宗婺源江慎修其文宗桐城劉海峯也所居在歛西靈金山中有林泉之勝晞原親賢好學四方賢者至歛無不樂交晞原晞原亦延致其家唯恐其去名聞甚廣乾隆丙午科大興朱石君侍郎主江南試自決必能以第一人取晞原而晞原是時已不應試後又四年晞原卒其卒年六十一矣晞原父曰候補布政司理問常客於漢上而使晞原家居為學及為其曾祖祖母營卜葬地數年晞原學益深而登涉川原盡得兩世葬地